



## Մ Ա Յ Ր Ա Թ Ո Ռ Ո Ւ Մ

Հունիսի 2-ին, կիրակի, Հոգեգալուստ: Օրվա մեծ տոնի առթիվ Մայր Տաճարում սուրբ պատարագ մատուցեց Վեհափառ Հայրապետը: Ս. Սեղանին սպասարկում էին գերաշնորհ Տ. Ասողիկ և Մաշտոց սրբազանները, հոգեշնորհ Տ. Գրիգոր և Ներսես վարդապետները, հոգեշնորհ Տ. Նարեկ արեղան և արժանապատիվ Տ. Հովհաննես քահանան:

Վեհափառ Հայրապետը ընթերցեց Ս. Հովհան Ոսկեբերան հայրապետի մեծ աղոթքը և քարոզեց Հոգեգալուստյան տոնի հոգևոր նշանակության մասին:

Սուրբ պատարագին ներկա էին Ստամբուլից եկած ուխտավորներ, որոնք հաղորդվեցին:

\* \*

Հունիսի 7-ին, ուրբաթ, Վեհափառ Հայրապետի բարեհաճ կարգադրությամբ, Լոնդոն ուսանելու մեկնեց Մայր Աթոռի միաբան հոգեշնորհ Տ. Ներսես վարդապետ Պապուկյանը, 3 տարվա ժամանակով: Հայր սուրբին ճանապարհեցին հոգեշնորհ Տ. Մեսրոպ վարդապետը, հոգեշնորհ Տ. Արսեն և Տ. Նարեկ դաբղաներն ու բարեշնորհ Կարպիս և Կալծակ սարկավազները:

\* \*

Հունիսի 9-ին, կիրակի, Մայր Տաճարում պատարագեց և քարոզեց հոգեշնորհ Տ. Գրի-

գոր վարդապետը, բնաբան ունենալով «Ես եմ ջուրն կենդանի»:

Սուրբ պատարագին ներկա էր Վեհափառ Հայրապետը:

\* \*

Հունիսի 10-ին, երկուշաբթի, «Տօն սրբոց կուսանացն Հռիփսիմեանց»: Ս. Հռիփսիմեի տաճարում պատարագեց վանքի վանահայր արժանապատիվ Տ. Հովհաննես քահանա Մարությանը: «Հայր մեր»-ի ժամանակ պատարագիչ հայրը քարոզեց «Անձինք նուիրեալք սիրոյն Քրիստոսի» բնաբանով: Տաճարը լիքն էր էջմիածնից և Երևանից եկած հավատացյալների բազմությամբ: Սուրբ պատարագը երգեց Հոգևոր ծննդարանի երգչախումբը: Հավարտ սուրբ պատարագի տեղի ունեցավ հոգեհանգստյան պաշտոն երանաշնորհ Կոմիտաս և Փիլիպոս կաթողիկոսների և Ս. Հռիփսիմե տաճարի նորոգությանց բարերարներ Հյուսիսյան և Մանուկյան գերդաստանների ննջեցյալների համար:

\* \*

Հունիսի 11-ին, երեքշաբթի, «Տօն սրբոց կուսանացն Գայիանեանց»:

Ս. Գայանեի տաճարի նորոգության պատճառով սուրբ պատարագը մատուցվեց Մայր





Տաճարում: Պատարագեց արժանապատիվ Տ. Մկրտիչ ավագ քահանա Մկրտչյանը և քարոզեց ավուր պատշաճի:

\* \* \*

Հունիսի 13-ին, հինգշաբթի, «Տօն Սրբոյն Յովհաննու Կարապետին և Աթանազիէի եպիսկոպոսին»: Սուրբ պատարագը մատուցւեց Ս. Շողակաթի տաճարում: Պատարագին էր արժանապատիվ Տ. Հակոբ քահանա Հակոբյանը:

\* \* \*

Հունիսի 15-ին, շաբաթ, «Տօն սրբոյն Գրիգորի Լուսաւորչին մերոյ ելն ի վիրապէն»: Մայր Տաճարում պատարագեց և քարոզեց հոգեշնորհ Տ. Նարեկ արեղան «Ընտրեալ յԱստուծոյ Քահանայապետ ճշմարիտ և հովիւ հոգեւոր բանաւոր հօտի» բնաբանով:

\* \* \*

Հունիսի 16-ին, կիրակի, «Տօն Կաթողիկէ Ս. Էջմիածնի»: Մայր Տաճարում պատարագեց և քարոզեց գերաշնորհ Տ. Ասողիկ եպիսկոպոսը բնաբան ունենալով «Ոչխարք իմ ձայնի իմում լսեն և ես ճանաչեմ զնոսա և զկնի իմ գան» (Յովհ. Ժ 27):

\* \* \*

Հունիսի 17-ին, երկուշաբթի, Հոգեւոր Ճեմարանի ուսանողութունը և դասախոսական կազմը, գլխավորութեամբ Ճեմարանի վերատեսուչ գերաշնորհ Տ. Հայկազուն արքեպիսկոպոսի, մեկնեցին չորսօրյա շրջապատույ-

տի՝ Երևան—Լենինական—Կիրովական—Ալավերդի երթուղով: Նրանք այցելեցին Հառիճ, Մարմաշեն, Հաղբատ և Սանահին պատմական վանքերը և ամսի 20-ին Սևանի ճանապարհով վերադարձան Մայր Աթոռ:

\* \* \*

Հունիսի 17-ին, երկուշաբթի, Մայր Աթոռ ժամանեց Իրանի հայ գաղութի ծանոթ ազգայիններէց պր. Ռոման Իսայանը: Պատվարժան հյուրին Ջուլֆայի կայարանում հանուն Վեհափառ Հայրապետի դիմավորեց Մայր Աթոռի դիվանապետ Հ. Առաքելյանը: Նույն օրը Վեհափառ Հայրապետը բարեհաճեց ընդունել մեծարգո հյուրին և զրուցեց Իրանի հայ թեմի ազգային-եկեղեցական կյանքի մասին:

Չորս օր Վեհափառ Հայրապետի հյուրը լինելուց հետո, պր. Ռ. Իսայանը վերադարձավ Թեհրան նույն ճանապարհով:

\* \* \*

Հունիսի 23-ին, կիրակի, Մայր Տաճարում պատարագեց և քարոզեց Մայր Տաճարի ավագ լուսարար հոգեշնորհ Տ. Մեսրոպ վարդապետ Պալյանը: Պատարագիչ հայր սուրբը խոսեց Մեծն Ներսես հայրապետի կյանքի և գործունեության մասին, բնաբան ունենալով «Յիշեցէք զառաջնորդս ձեր, որ խօսեցան ձեզ զբանն Աստուծոյ» (Եբր. ԺԳ 7):

\* \* \*

Հունիսի 30-ին, կիրակի, Մայր Տաճարում սուրբ պատարագ մատուցեց արժանապատիվ Տ. Մկրտիչ ավագ քահանա Մկրտչյանը:

